

Kalaallit Danmarkimi ilinniagaqartut danskit ilinniagaqartut assigalugit tapiissutitigut pisinnaatitaaffiisa assinginik periarfissaqalernissaat pillugu Naalakkersuisut suliniuteqaqqullugit peqquneqarnissaannik Inatsisartut aalajangiiffigissaattut siunnersuut.
(Inatsisartuni ilaasortaq Aleqa Hammond, Siumut)

Akissuteqaat

(Ilinniartitaanermut Iisimatusarnermut Nunanullu Avannarlernut Naalakkersuisoq)

Siullermeerinnineq.

Kalaallit Danmarkimi ilinniagaqartut danskit ilinniagaqartut assigalugit tapiissutitigut pisinnaatitaaffiisa assinginik periarfissaqalernissaat pillugu Naalakkersuisut suliniuteqaqqullugit peqquneqarnissaat Inatsisartunut ilaasortap Aleqa Hammondip siunnersuutigaa.

Aallarniutigalugu oqaatigineqassaaq Danmarkimi ilinniartortavut ilinniartutut danskisulli tapiissutisiaqarnissamut periarfissaqarmata, tassami SU-mik danskillu tapiissutaannik allanik pisartagaqalersinnaagamik tamatumunngalu peqatigitillugu ukiumoortumik Nunatsinnut tikeraarnissamut akiliunneqarsinnaatitaallutik.

Ilinniartitaanermulli tunngasut Naalakkersuisut pingaartittuaannarpaat taamaattumillu aamma ilinniartut kattuffiinik ingerlaavartumik oqaloqateqartarlutillu suleqateqarlutik. Tamatumunnga nangitsissutit Naalakkersuisut oqaatigisinnaavaat Naalakkersuisut suliniutinik kalaallinut Danmarkimi ilinniartunut iluaqutaasussanik aallartitsererlutillu pilersaaruteqareermata.

Naalakkersuisut siunnersuuteqartutulli ilinniartut Nunatsinni Danmarkimilu kattuffiinik arlaleriarlutik ataatsimeeqateqartarput. Tamatuma saniatigut Avalaap Naalakkersuisut suleqatigalugit misissuinerani pissutsit aalajangersimasut arlallit apeqquserneqarput, taamatullu aamma allannguutissatut siunnersuutinut, tamatumunnga tunngavissaqarluartillugu Naalakkersuisut ammallutik.

Tassunga atatillugu ilisimatitsissutigineqarsinnaavoq Ilinniagaqarnersiutit pillugit Inatsisartut peqqussutaata nr. 5-ip, 14. november 2004-meersup iluarsaanneqarnera Naalakkersuisut aallartimmassuk. Inatsisissatut siunnersuut UKA 2011-mi akuerineqassappat Naalakkersuisut ilinniagaqarnersiutit pillugit nalunaarutissamut aalajangersakkanik ilanngussinissaq pilersaarutigaat, kalaallit Danmarkimi ilinniartut aalajangersakkat erseqqinnerusut naapertorlugit angallannermut tapiiffigineqarsinnaanngorlugit atuakkanullu tapiiffigineqarsinnaanngorlugit. Aammattaaq ilinniartunut taarsigassarsinnaatitaasunut tamanut taarsigassarsinissamut periarfissat allanngortinneqarnissaat siunnersuutigineqarpoq. Tapiissutit killiliussaareersunit akilernerqarsinnaasussatut naatsorsuutigineqarput taarsigassarsinissamut periarfissat Aningaasanut Inatsisissamut ilanngunniarneqassallutik. Taamaattumik suliniutit marluk pineqarput, kalaallit danskillu Danmarkimi ilinniagaqartut akornanni assigiinngissutaasinnaasunik millisaataasussat, Naalakkersuisulli tamatumani isumaqarput Nunarput malittarisassanik Danmarkimi qaqugukkulluunniit aalajangersarneqarsinnaasunit pisussaaffilersorneqartariaqanngitsoq.

Naalakkersuisunit tamanna pillugu malugeqquneqassaaq Inatsisartut ilinniagaqarnersiutit pillugit inatsisartut peqqussutaat atuuttoq naapertorlugu ilinniagaqarnersiutit taarsigassarsiallu annertussusilerneqarnissaannik, ikaarsaariarnermut aaqquussinernik aningaasanullu inatsimmi

immikkut tunniunneqarsinnaasut annertussusissaannik aalajangersaasuusussaammata, tamannalu nutaamik inatsisiliornikkut allanngortinniarnearani.

Ilinniagaqarnersiutit pillugit Inatsisartut inatsisissaattut siunnersuut taaneqartoq Inatsisartut suliarinninnerat apeqqutaatillugu 1. januar 2012 atuutilissasoq naatsorsuutigineqarpoq. Tamatuma saniatigut ilinniagaqarnersiutit pillugit nalunaarutip nutaap taaneqartunik pitsanngorsaaffiusup tassunga peqatigitillugu atuutilersinneqarnissaa siunertaavoq.

Kalaallit Danmarkimi ilinniartut ullumikkut Danmarkimi ilinniartutulli ilinniagaqarnersiutaasa assinginik taperneqarsinnaammata Naalakkersuisut siunnersuutip akuersissutigineqannginnissaa inassutigaat.